

sedau giu mo a Cuera et enzacontas autras vischneuncas; *fabricas* bunamein naginas. Ina quantitat luvrus jasters, professionists e luvrers, tuttavia Tirolers, Suevs e Talianers anfen cheu lur fadigias e portan bia da-neers grischuns ord la tiarra.

Tgei gudoign savess il Grischun bein trer ord ses products, sch'el, sco ils Svarzvelders, tagliass ora de tuttas sorts raubas lenarias, — sco il Glarunees — figiess ord sia crappa e siu caschiel in artechel de han-letg, — luvrass ora sia launa e siu tgiern, — cungies sez ils bia nielli tgirs e pials, che vegnen vendi crius, — u seneziass tier de tuttas uisas fuormas las diversas sorts crappa nizeivla, sco alabaster, serpentin e marmor etc. etc. Ils metallis de sias montognas savess el sez cavar, ord quels fabricar raubas, e destinar semigliants scazzis de sia tiarra e de sia tratgia de biestgia en megliera fuorma per artechels de negozzi. Da ses uauls, da sias auas mineralas e da sias vias sur ils cuolms savess el trer ora pli gron gudoign, che sco tochen da cheu! Il Cantun Grischun ei buc pli paupers, ch' autras tiarras de cuolms; mo tier il pievel meunc'ei gust e tchaffen per interna industria. El fa buc bein, da comprar dagl jester ton ponn, curom, raubas lenarias, tgiern e fier, perfin pietun e caschiel!

Il liber-staat grischun ei derivaus ord ina uniuon dellas treis ligias; per quella raschun ha el ditg purtau il num: *liber-staat dellas cuminas treis ligias*. Cun ils Svizzers fuv'el fraternisauis, e quels numnavan el lur *liug admess*. Aschia fuv'ei tochen l'entschatta de quest tschentaneer; cheu ei allura err' il Cantun Grischun passaus en la confederaziun e da lur' enneu ha el formau il *quindischavel* Cantun.

La suprema pussanza enten il liber-staat grischun stat tier als *cusseigl* e *vischneuncas*; sia constituziun ei *democratica*; la suprema auctoritat della tiarra ei il *Cusseigl Gron*, consistent ord 66 deputai (mess) dil pievel. Biaras fatschentas della tiarra vegnen consultadas dalla *Standescommissiun*. Ils fatgs de regenza regulescha il *Cusseigl Pign*, componius ord treis Caus dellas ligias; la ligia sura dat il *Landrichter*, la ligia della casa de Diu il *Bundspresident*, la ligia dellas X dertgiras il *Bundstandammann*.

Il spiritual uffeci pastoral sur la *baselgia catholica* en il Cantun Grischun ha gl' *uestg da Cuera*; mo ils Catholics en Puschlav auden tier la diocesa digl *uestg da Com*. Ils affars della *baselgia reformada* vegnen regulai dalla Synoda et in *cusseigl ecclesiastic*.

Ei dat err' auctoritats, ch' han da vigilar e d' haver quitau per ils fatgs de *militær*, de *sanadat*, *posta*, *vias*, *transit*, *pli aultas caussas giudicialas* et auters *affars publicis*.

Tenor la politica partiziun della tiarra consista:

1) *La ligia sura* ord las otg dartgiras grondas: *la Cadi*, *Uorz la Foppa*, *Longneza*, *Foppa*, *Flem*, *Tuseun*, *Schons* e *Mesauc*.

2) *La ligia della casa de Diu* ord las endisch dartgiras grondas: *Cuera*, *las 5 Vischneuncas*, *Dumliasca*, *Vazsu*, *Surmir*, *Stalla*, *Bergaglia*, *Giadinasu*, *Puschlav*, *Giadinasut* e *Vall-Münster*.

3) *La ligia dellas X dertgiras* ord las siat dartgiras grondas: *Tavau*, *Closters*, *Castels*, *Schiers*, *Majafeld*, *Schanfigg* e *Belfort*.

En il Cantun Grischun dat ei mo *treis* marcaus, numnadamein: *Cuera*, *Glion* e *Majafeld*; gl' emprim ei la capitala dil Cantun e la residenza dellas auctoritats